

ASO TOFI, 18 FEPUARI 2021

Na nofoia e le Sui Fofoga Fetalai le Nofoa i le itula e 9:27 i le taeao e tusa ai ma le Tulafono Tumau 27(1).

Tatalo.

SUI FOFOGA FETALAI: Ou te faasilasila atu ua toe amatalia nei Taualumaga a le Fono Aoao Faitulafono.

Ua ese foi le vaai i lenei taeao. Ua ou manatua ai le Maota nai Amoa na momoo ai le tamaitai, ua lau i ula ae poupou i toa. Malo le soifua, malo folau i le paia o le Palemene.

E faatalofa i lau Afioga i le Taitai o le Maota, lau Afioga i le Palemia, malo le soifua, malo le faatoatoa. Le Aiga Kabeneta, malo le onosai, o lea ua lalata lo outou faiva e faasoaa ai, aua le faafogfa a le atunu i ona tamaoaiga.

Ia, Sui Minisita faapea foi lea Itu o le Maota, matou faatalofa atu, malo le usufono, malo le onosai, malo le tumau i lo outou valaaicina e ala i filifiliga a outou Afioga aua le sa tele ma le sa folau o le atunu.

Matou faatalofa foi i le ee mai o le paia maualuga i Ofisa Sili o Pulega o Matagaluega a le Malo, e faapea foi Faalapotopotoga Tumaoti. Malo le galulue, malo le onosai, o outou lava o le malosi lena o le tatou Faigamalo.

Ia, le paia o le Failautusi ma le mamalu o le Ofisa, ia sagai ane ai o le tai i lenei taeao e tautua le tatou Fonotaga.

Ia, le tapuaiga a Samoa e le galo, faafetai i la outou tapuaiga lē leoa, po le fala ma tuitui mai pea le mulila aua le tapuaiga o le Fonotaga a lou atunu. Ia tapuai maia, lalafo i le Atua e manuia ai faiva o lenei aso.

TULAFONO TAU FAAOFI O LE FAATATAUINA O TUPE FAAOPOOPO (NU.1) 2020/2021 – felafolafoaiga faaauau i luga o le faitauga faalua – Aso 22

SUI FOFOGA FETALAI: E tolopo Galuega a le Fono Aoao i le aso Fono ananafi ua maea ona saunoa le sui usufono mo le itumalo faaalaalafaga o Alataua Sisifo, ia po o le Taitaifono foi o le Komiti o Tupe.

O lea foi ua oo le faasologa i le talifuaitau a le Malo e tusa o mataupu sa laga i luga o lauga a sui usufono a le Palemene. O lo o maua manino foi e le

Maota taualumaga o le aso ananafi, e le i maea le folasaga amata a le Malo e ala i le saunoaga a le Taitai o le Maota lau Afioga i le Palemia.

Ma ua manatu ai i le ava ma le faaaloalo ou te tapa lau Afioga, o le avanoa lenei e faaauau ai lau saunoaga.

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai, ia, e lē toe vāea le falaooto aua paia faalupelupe o le tatou Maota i lenei taeao fou. Afio o lau Afioga i le Fofoga Fetalai, e faapea foi sui usufono mamalu o le Maota nei, i le maleifua mai i lenei taeao fou. O lea foi ua i luma o le Atua Silisili Ese, o le Atua o lo o faavae ai le Malo o Samoa le viiga ma le faafetai pei ona e tapenaina ai le tatou talosaga e tuuina atu ai o tatou loto ma agaga e taitaiina i le poto o lo tatou Matai Sili aemaise le faatinoina o tatou tiute e tusa ai o le tatou tautoga i luma o le Atua, tatou te omai e faatino o tatou tiute aua le faalagamaea a Samoa i le Malae i Tiafau nei. O le Malae o le Faautugatagi, o le Malae o le Sailigamalo a Samoa, o le Malae e naunau uma i ai tootoo o itumalo e tutulai atu ai i totonu o le Maota lenei e sausaunoa e togi le maa. O le sao o tupu ma ee o le itumalo e fausia le Malo o Samoa e pei ona sailimalo ai o tatou matua. O ai sē na te lē tauaveina le mamalu, le mamalu ua faaee mai i o outou aao, o le tapuaiga mamalu a tupu ma ee o itumalo, o ai se na te le tauaveina, ia, e le o tausisia le tautoga na faia i luga o Afioga Paia a le Atua, o le a tatou tautuaina o le tatou tofi o le valaauna o tatou tatou te auauna e fau lo tatou Malo, aemaise ia saoifagā le anoano o luitau o le soifua i nei aso, aemaise o le pepesi o faama'i, ma le afaina o le lalolagi i le mala pito maoae ua feagai nei ma le lalolagi atoa o le suiga o le tau.

Sa ou talanoa i le aso ananafi i le va fealoaloai galue o Minisita o le Kapaneta ma Ofisa Sili o Pulega o Matagaluega ma Faalapotopotoga Tumaoti o le tatou Malo. O Minisita o le Kapaneta, e auala atu ai mataupu uma lava i vaega eseese uma lava o le Malo, po o le a lava le matafaioi, o faatoaga, o aoga, o le soifua maloloina, o atinae tetele, e auala mai ai mai Matagaluega taitasi ina ia soalaupule e Minisita o le Kapaneta i a latou fonotaga faifaipea. Ae tatau ona faapepa uma mataupu ia ina ia manino i le Pepa a le Kapaneta ua faapuupuuina, PK. Ma faapena ai ona faanumeraina ma ia faatulaga foi le aso ina ia faigofie ona lagalaga mai pe a moomia i se taimi vave. Ia manino le agaga o le Pepa. Pe o le a tonu le faaiuga o lo o moomia e le Minisita ma lana Matagaluega, e tatau ona faia i ai se Faaiuga a le Kapaneta. Faaiuga a le Kapaneta, FK i le faapuupuuga i mataitusi, tusia ma le aso ma le fuainumera, ina ia faafaigofie ona se'i mai totonu o faila i taimi vavave. E aumai ai manino, po o se faiga fou po o se faavae fou e moomia e limataitaiina ai le Malo, ae pe moomia ai foi le tusia o se Tulafono fou pe o se mea e moomia ai se seleni e faaalu. Afai o lea, e moomia foi la

se Lipoti mai le Matagaluega o Tupe, po o lava se tupe e faatupe ai. Afai e lē lava, e faapefea ona saili ma faatupe? Pe ono tapa foi se lipoti mai le Loia Sili, pe moomia se teuteuga o se Tulafono o i ai? Po o le toe tusia atoa o se Tulafono fou. A silasila mai la, e paia tele le vatapuia o Minisita ma Ofisa Sili o Pulega ma lana aufaigaluega e tautuaina vaega eseese o le tatou Malo, ina ia taunu ai i se faaiuga e ogaoga, se faaiuga e taua, se faaiuga e puipuia i so o se tulaga. Fesili le isi faipule sa polofesa i le USP ia te au i le fono a le faafaletui a le HRPP i le tausaga e 1989, “Pe aisea e faalogo tasi ai le Kapaneta ia te oe Tuilaepa i mataupu tau le atinae, mataupu tau tupe?”. O lau tali, “O au o le Minisita o le Atinae ma le Tupe, o au e alu atu ai mataupu uma lava tau tupe ma le tamaoaiga i le fono a le Kapaneta.” E pei foi o le mataupu e aafia ai faatoaga ma faigafaiva, e tasi lava le mea e sau ai i totonu o le Kapaneta, o le Minisita o Faatoaga. A oo foi i mataupu tau aoaoga, e tasi lava le leo e sau uma ai mataupu nei, e tasi le auala, o le Minisita o Aoga. O le ala lena e tofitofi ai e le Palemia i le amataga o tofiga lea Minisita ma lea Minisita e vaiaia lea Matagaluega ma lea Matagaluega.

O le uiga lau Afioga i le Fofoga Fetalai, o le fono lea a le Palemia ma le Kapaneta lea e toa-12 Minisita ma au e toa-13 ai, o lo o i ai le faamoemoe e toe faaopoopo le isi 2 i le Nofoaiga fou, po o ai lava le Faigamalo e tulai mai, ona ua tupu le Malo, tupu matafaioi. Lea sa faafogafoga lelei i le aso ananafi i le tolaulauina mai e le Taitafono o le Komiti o Tupe le tetele o le eseesege mai lea 10 tausaga i lea 10 tausaga, e ao ai ona faasoa le galuega. O lea la sa ou taua le fonotaga lea a matou, e le o se fonotaga na te i ua fai, o se fono vevela, o le matua vevela o finauga. Aisea? Ona o le fono tonu lava lea e usu ae o lo o tapuai e le Vaega Faaupufai po o nisi o le Vaega Faaupufai le gasegase o le matou Taitai o lo o taoto i Niu Sila, o lea e le iloa pe tua ma ni a. Ma o le ala lea na lagalaga ai le fono lea, e le o se fono masani, a o le fono na matua lagalaga.

Lau Afioga i le Fofoga Fetalai, e fono le Kapaneta i aso Lulu uma lava o le vайасо. Afai lava ua tele mataupu, ua 2 fono po o le 3 foi fono i le vайасо. O nisi lava taimi ua 4 fono, aemaise lava taimi e tulai mai ai puapuaga o le tatou atunu. E faagasolo taualumaga ma faaiuga i le Koviti i le taimi o le vevela o le pepesi mai o faamai ma le ono aafia o Samoa, na oo lava i po o Aso Sa o fono le Kapaneta, i fuafuaga mamao mo le tau faasoasoaina o le tamaoaiga ae faapea foi le tulaga o le ulufale mai o vaa oloa mai fafo pe aumai ai ma ni faamai. Na valaauna ai Ofisa Sili o Pulega o Matagaluega, valaauna ai ma i latou e fai a latou pisinisi i tua matou te feiloai. A oo la ina oo i mataupu ogaoga a ua le fetaui ma le aso fono, mataupu e tatau ona vave fai i ai faaiuga, ona faataamilo loa lea o le pepa, aemaise lava mo gasegase e tatau ona vave fai i ai iuga e ave i fafo, ina ia vave tuu atu le fesoasoani i le o moomia le fesoasoani, ae tatau lava ona tapa le fautuaga mai le soifua maloloina. Aisea? E le mafai ona avea se mai i fafo seivagana ua aumai le lipoti mai a le falemai e fai malamalama ai le faaiuga. E tele lava taimi e

nanati mai ai nisi o aiga, ae le mafai lava ona gaoioi le Kabeneta, seiloga e aumai le lipoti a le falemai. O i ina e iloa ai pe tatau ona ave pe tatau ona togafiti i Samoa nei, ae pe na o se panadol foi e moomia ai, a o lea e manao le aiga e ave o lea e i ai le faipule e manao e faaaoga le paoa lena e le talafeagai. O le mea la lena lau Afioga i le Fofoga Fetalai, mo le puipuiga foi o le tauleleia o tatou fomai, e tatau lava ona aumai se lipoti mai le falemai.

Sa alu atu i lau tautalaga i le po anapo, sa ma feiloai ma se tasi foi o tamalii ua gasegase i le cancer. Peitai ane ua tau faaletonu le tulaga o femalaga aiga, aemaise le faigata. Ona fono ai lea o fomai e toa-fa ma talanoa i ai, o oe lava e faia le faaiuga, a o lou cancer e mafai lava ona matou taotoina i Samoa nei. Lau Afioga i le Fofoga Fetalai, o le lototeli ma le faatuatua o le toeaina lea na faapea ai, afai ua outou silafia o lo o ia te outou le tomai ma le faatuatua i le Atua e ono auala mai ai le mana lilo e auala mai i lo outou tomai, taoto au i inei. Na ma talanoa, ua uma le taotoga ua uma ma le kanesa.

Lau Afioga i le Fofoga Fetalai, o lo o i ai lava le tomai i tatou fomai, ae i ai lava foi le musua i nisi o e mamai, e manao lava e malaga i Niu Sila. Lau Afioga, e tatau lava ona maua mai le clearance o le lipoti mai ia i latou e i ai le tomai e silafia lelei ai le ituaiga gasegase o gasegase ai le tagata. E taua tele fautuaga ia lau Afioga i le Fofoga Fetalai mai Ofisa Sili o Pulega e fau ai faaiuga a le Kabeneta. Lea e fai mai se tasi o itu tetee, ua leai se aoga o le Kabeneta, ua leai se aoga o le aufaigaluega a le Malo ua fai toatasi e le Palemia faaiuga. O se matua upu lē faavaea, aemaise pe a sau i se isi sa saofai i totonu ma mataitu taualumaga, e le o suia faasologa o fonotaga a le Kabeneta ma auala e faatino ai. Mai lava i le taimi sa i ai Tofilau e tau mai ia te au, sa saofai ai foi i totonu.

Lau Afioga i le Fofoga Fetalai, e matua maoae le taleni talapelo lea ua i ai i totonu o le tatou atunuu, i latou o lo o faia se tete'e faasaga mai i le Malo. O le ala lea ua ou agai ai i procedures, i auala o mea, e tatau ona faafogafoga mai i ai latou o lo o latou maua faamatalaga nei, aemaise o le faasalalauina i luga o nusipepa. O talanoaga foi a le Kabeneta, e le taofia le faaali saoloto o finagalo o Minisita. A lavelave foi se mataupu, e valaau atoa lava, po o ai lava o lo o i ai, o le Ofisa Sili o Pulega ma ona soatau, po o le Loia Sili, ia po o le Matagaluega foi o le Tupe, ia po o le Ofisa Sili o Pulega o le Matagaluega o Faatoaga po o le Falemai e valaauina, e o mai i luma o le Kabeneta e toe saga tu'i i fesili ia aumai ni faamalamalamaga faaopoopo i luga atu o mataupu o lo o tusia i lalo o le pepa e faia i ai se faaiuga faaiu, ae fai ua lava tapena, lava puipui.

O tala uma autu o le Tupe lau Afioga, a oo ina faatalanoaina, e talanoa muamua i le Matagaluega o le Tupe ona faaiu mai lea i le Kabeneta. E matua valaau uma lava Ofisa Sili o Pulega o Matagaluega ma Faalapotopotoga, e toe o mai i totonu o le potu o le Kabeneta ona matua toe fai atoa ai lea o le faasologa o talanoaga faasolosolo i a latou Tala o le Tupe a lea Matagaluega po o lea Faalapotopotoga. E fono faatasi ai ma Minisita o le Kabeneta, o

Minisita, o latou ia Ofisa Sili o Pulega eseese o lo o matou talanoa. Ae faaiu lava le talanoaga i lea Matagaluega i le fesili; "E a, ua e malie i le tupe ua faavagavaga mo lau Matagaluega ma lau Minisita?" E ono puna mai le Minisita ma faapea mai, "Faamolemole, se se i toe faaopoopo mai sina fasi keke e le maoona lau Matagaluega, tulou." O i ina e ono fesili ai le Minisita o Tupe po o au foi, "O le tatou tupe fuafua mo le Tala o le Tupe o lo o talanoaina, e leai lava se mea e eseese ai ma le keke o le a faasoa, o le keke e le mafai ona faameme'i pe faalapo'a. O le keke lava o le keke. A tele la lau fasi keke, o ai la o le a faapaei lana fasi keke? O le Ofisa ea o Aoga po o le Soifua Maloloina?" O i ina tonu e puna mai ai ma Minisita ia e toa-lua, "Leai, soia se e te manao lasi, e tele foi mea e fia fai a maua Matagaluega." O le fono faaiu lava tuufaatasi a le Kapaneta ma Ofisa Sili o Pulega, le fono lea, ona tapena ai loa lea o le Tulafono i le Palemene mo le faasoasoa o tupe a le Malo, faatasi ai ma le Tala o le Tupe, faatasi ai ma le lauga a le Minisita ua maea foi ona pasia e le Kapaneta i le fonotaga lava lea. O lea la, e aumai i luma o le Palemene e fofogaina ai le Palemene ma le atunu. E aumai i ua uma ona soalaupule le tala atoa. E i ai uma lava la vaegatupe uma ia sa oo i ai le faamalamalamaga a le Taitaifono o le Komiti o Tupe a le Palemene. E leai se mea e le i oo i ai le vaaiga a le Kapaneta, o vaegatupe eseese, manino mea uma. E oo lava i sene e sau i totonu ma sene e alu atu i fafo, e taoto lelei i totonu. O se isi lava la e faapea mai e sese mea ia, o lona uiga e matua lē malamalama lava i le Tala o le Tupe, o lo o faataatia mai totonu o le Maota lenei, auiliili mai ai vaegatupe uma lava na faameaalofa mai fafo ma le vaevaeina i lea atinae ma lea atinae.

Lau Afioga i le Fofoga Fetalai, i lalo o au matafaioi, e i ai foi le Fono Faatonu. O le fono lea e i ai Le Ao o le Malo ma Minisita o le Kapaneta. I le taimi atoa sa matou galulue ai ma le matou Palemia, le taitai o Tofilau Eti Alesana, e na o le faa-tasi lava ona fono matou ma le Susuga ia Malietoa O Le Ao o le Malo. Ina ua tulai mai lē na sosoo, le Afioga ia Tupua Tamasese Efi, e faalua ona fai le fono lea, o se fono taua tele lava. O le 2 po o le 3 vaiaso talu ai, sa matou fono ai o au ma lau Kapaneta ma le Afioga ia Tuimalealiifano O Le Ao o le Malo. O le Fono Faatonu lea. E matou te feiloai ai ma talatalanoa faasamasamanoa, o le uluai feiloaiga lea talu ona tulai mai i le tofi, ma talatalanoa ai i le taimi o le a faataape ai le Palemene, e i ai le sauniga taua lava. O tulaga masani sa tatala le Fono a le Palemene i vaitaimi uma lava, e lumanai ai le tatou sauniga o le sisiga o le fua o le Tutoatasi o Samoa. Pe a ma le 10 tausaga talu ai, na faia ai le iuga i faiga faavae, ina ia faamamalu pea sauniga nei. O le a na o le 2 lava taimi, e tulai mai ai Le Ao o le Malo. O le uluai Fono e tatala ai ina ua uma ona faia le faiga palota, ma le uluai Fono a le Palemene fou. Ona afio mai loa lea O Le Ao Mamalu o le Malo e tatala aloaia ma le taimi e tapuni ai le Fono faaiu, ona faia ai lea o le sauniga e afio mai Le Ao Mamalu o le Malo na te tapunia. E faia ai le sauniga tele lava, e afio mai ai Le Ao o le Malo e faalaeiau, e

aumai lana faafetai i a outou Afioga i galuega tele sa faafeagai ai i lena 5 tausaga, ma aumai ai foi ma lana faamanuia. A o alofaiva le atunuu i lana faiga filifiliga, o lea sa matou talanoa ai faasamasamanoa. A o tulaga lava ia o le fono, o le avanoa lea, a alu atu ai se iuga a le Kapaneta. Ia i ai le agaga O Le Ao mamalu e toe lagaina se mataupu, e pei o se Tulafono ua pasia e le Palemene, ae ua i ai sona manatu e faalē o ogatasi le futia ma le umele i se Tulafono ma lona Ia foi finagalo. O i la e avanoa ai feiloaiga faapea, e 7 aso e tuuina atu i ai i Le Ao Mamalu, o le 7 aso lea, e mafai ai ona toe fetuunai foi le tofa a le Kapaneta, ia faapena foi ma Le Ao Mamalu. A fai lava la e uma le 7 aso a o lo o tutumau pea le manatu o le Kapaneta, e le toe i ai se isi gaoioiga e fai, ae ua le i ai foi se tala mai o i Le Ao Mamalu o le Malo. O le taimi la lena, e faagasolo ai loa le Tulafono. O aiaiga lena o lo o i lalo o le Faavae na talanoaina e o tatou tuaā i le 1960, ma tuuina i ai i totonu o le Faavae i le 1962. O lea la sa matou feiloi ai o mataupu e valaau ai le fono, o lea ua uma ona ou taua. Ma ou te taloina le fono pe talo foi e Le Ao Mamalu le fono, ma o tulaga na o sootaga taoto i le Faavae, o le vatapuia lea O Le Ao o le Malo, faapea foi ma le Kapaneta.

Lau Afioga i le Fofoga Fetalai, o le itu taua lena, o lea sa ou manatu ou te agai i ai i le tulaga i le aoao tetele ina ia faamaapeape lelei i le faafogoa mai a le atunuu ala o mea i le faatautaiga o le tatou Malo. O Le Ao o le Malo, o lana mataifaioi, o le faamaepaepa, faamalumalu. O le Palemia ma le Kapaneta, o auuna galulue, e suati le palapala, faatasi ai ma le aufaigaluega a le Malo, ina ia atiae lo tatou atunuu. A o Le Ao lava ia o le Malo, e na ona faamaepaepa lava ma silasila, ma maimoa.

Lau Afioga i le Fofoga Fetalai, ua ou manatu e faauma atu lau tautalaga ona faagasolo ai lea o le faasologa. I le upu puupuu lava, i le matafaioi a le Matagaluega o le Va i Fafo ma Fefaaatauaiga, o lo o i lalo o lau vaaiga. O le Matagaluega lenei, e fai lava si tele o ana matafaioi, o lo o gafa lea ma faiga faavae faava-o-Malo. E faatasi ai ma le faatinoga o ia faiga faavae, o faiga faavae faava-o-Malo a so o se atunuu, e faavae lea i luga o auala e filifilia lelei. Ina ia puipua malu ai manaoga, ma aia tatau a le atunuu. Ma ausia ai ana matatia manaomia, ina ia puipua le va fealoaloai ma ana paaga uma. O le filifiliga o ni auala talafeagai, e faatino ai faiga faavae, e uunaia ai malosi faiga faapaaga a Samoa ma isi atunuu. O le naunautaiga o Samoa, ia uunaia le va fealoaloai mo le ausia o le filemu toofilemu o le tatou atunuu. O faigaao ma faigapaaga mausali ma le faamalosia o sootaga ma atunuu, e ogatasi o tatou talitonuga, ma manatu faatauaina faatasi, ina ia ausia tulaga i le tatou itulagi o le Pasefika. O lo o faaaauau ma faalauteleina lona auai ma le tele o atunuu o le lalolagi i faigapaaga faava-o-Malo faatasi ai ma le fai o le sao taua, e le atinae ma upufai o le itulagi lenei. E faapea foi ma aafiaga o le lalolagi atoa. Ae le gata i lea, o lo o faatupulaia foi le talaaga faava-o-Malo o Samoa e ala i lana fautua, fautua tuusao, fautua e tuuina atu ma le lē fefe.

i I le auai i fonotaga iloga a vaega faapitoa, e i ai atunu o atumotu laiti, atunu o le Pasefika, faapea foi atunu e matua maaaleale o latou tamaoaiga. E le gata i lea, e taumafai lava foi si o tatou tamai atunu, ina ia auai i faiga faava-o-Malo mo fefaatauaiga, o le ute lea o nei mau atinae e fai, ia sologa lelei ia fefaatauaiga. E leaga o fefaatauaiga e maua ai le ola, ma tupe e faaauau ai a tatou fesootaiga ma fefaatauaiga o lo o manaomia mai e isi Malo. O fefaatauaiga ma atunu nei o lo o tulata mai i le tatou itulagi, faapea foi ma le lalolagi atoa. O ni taumafaiga e maua ai foi ni pisinisi fou, ma le uunaia o faiga e lagolagoina ai le suiga taua mo le atinae lautele, o le tatou tamaoaiga.

Lau Afioga i le Fofoga Fetalai, o auga taua o ia faiga faavae faava-o-Malo, o le puipuia o le tulaga tutoatasi o lo tatou atunu. E faapea le pulega saoloto i ana faiga faaiuga, aemaise o le faalautele o avanoa, mo tatou tagatanuu. Ina ia faaititia ai faafitauli o le tatou laititi, ma le mamao o maketi o fefaatauaiga mai i si o tatou atunu. E ui o Samoa o se atunu atumotu laitiiti, o lo o tau atiae, ae tatau lava ona tatou faailoa atu le taua o le tatou sao. O nisi o taiala taua e faavae, i le faatinoga o le va fealoaloai faava-o-Malo e aofia ai. 1. Ia mafai ona atiae Samoa lona tamaoaiga ina ia sologa manuia, sologa lelei, ia ausia pulega mausali, ia maua e o tatou tagata uma, le felagolagomai ma le loto gatasitasi. O le vaega muamua lena. 2. O le uunaia lea o auala mo le faatupuina o le va lelei ma isi atunu, ae aua lava ne i afaina ai manatu faavae, ma le faamamafa o lo o ave i ai la tatou faataua i le tausiga o le va lelei. 3. Ia tatou amanaia aia tatau ma pulega saoloto a so o se atunu, aemaise o le usitaia o le malosi o le Tulafono. O lona uiga, tatou te tilotilo i le soifuaga po o faafoe i ala o le Tulafono, e masani ai atunu temokarasi. Ia po o le faafoe foi i ala o le pule malosi faa-militeli. O mea ia e vaai totoa i ai tatou, ia tatou faigapaaga. 4. Ia avea i tatou ma paaga e talitonuina, e le femoumouai. O uiga ia e sola ai le amanaia o tatou faigamalo ma le tauleleia o tatou tagata lautele. E po o alala i Samoa nei, po o alala i so o se tulimanu o le lalolagi, i fafo atu o Samoa. Ia tatou matua avea o se atunu, e talitonuina ona tagata, ona taitai e amanaia faatuatuaina e le lalolagi.

O le isi vaega taua, o le tatou auai i feiloaiga a Malo Aufaatasi, ma lotolotoi ai i talatalanoaga o pulega faava-o-Malo faapea foi ma alafua e taitaiina ai atunu uma lava. E pei o le maliega na sainia i Bale, i le tausaga e 2015, mo le puipuia o le siosiomaga, ma isi foi atinae eseese lautetele. Ia faaauau, aua ne i alu alu motusia. Sa matou sainia faatasi lea feagaiga taua i le 2015 i Bale i Farani. O nei manatu faavae ua faaaogaina e toe lauliliu ai matafaioi tauave a Matagaluega, ma otooto mai ai nisi o matatia na ausia i le 5 tausaga talu ai. Ina ua pasia le toe faatulagaga o le Matagaluega lenei o le Va-i-Fafo i le tausaga e 2017. Ina ia mafai ai ona iloa manino le talafeagai o le faatulagaga ma matafaioi tauave a vaega esese, aemaise ai o sootaga ma itutino o le Malo aemaise paaga i atunu ma Faalapotopotoga i fafo.

Lau Afioga i le Fofoga Fetalai, o le mafuaaga lea, e faasino uma ai fesootaiga uma lava, ma sootaga ma Malo ma Faalapotopotoga faava-o-Malo e faafoe e le Matagaluega lenei o le Va-i-Fafo ma Fefaatauaiga. E ala i Ofisa o Samoa, i atunu mamao, e faapea le taitaiga a le Matagaluega i so o se faatasiga faava-o-Malo, ua avea ai Samoa ma sui auai. E le gata i lea, so o se fesootaiga ma paaga a Samoa i totolu o le tatou atunu, e faasino uma i le Matagaluega o le Va-i-Fafo ma Fefaatauaiga. 1. O le Vafealoaloai faava-o-Malo, ua matua iloga le tulaga o Samoa o se atunu e talimalo lelei, i Ofisa faava-o-Malo i Apia nei. E faapea le anoano o fonotaga tetele a le itulagi lenei a le Pasefika. Ae a fonotaga ua usu mai a le lalolagi e ui i le tele atunu o lo o manaonao i ia avanoa, ae latou te le o maua? E pei o le fonotaga a Taitai o le Pasefika i le 2017. O le fonotaga a Saina ma le Pasefika i le tamaoaiga i le 2018. O le 2020, fonotaga a le EU ma le Pasefika i faiga faavae faaupufai o Malo 2019, sainia o le feagaiga fou i le va o le EU ma le ACP, lea e faamoemoe e saini mai i Samoa nei i le faaiuga o le tausaga nei. O le feagaiga lea, o le a tau ai lo tatou atunu mo le isi 20 tausaga i le lumana, ona o mataupu nei, e aafia ai ma faamaoniaina ai le 79 o atunu o le Pasefika, Aferika faapea foi ma le Karepeane. I lo tatou va feagai ai, ma sootaga faapitoa a atunu uma o Europa e sili atu i le 30. E faapea foi le fono a Taitai o Malo o Taupulega, ua uma ona pasia i le fonotaga sa ou auai, a Taitai o Malo o Taupulega i Peretania, e faamoemoe e usuia i se vaitaimi i le 2022 i le 2023. Ua matauina pea faagasologa o fonotaga nei ona o aafiaga i le Koviti-19, a o le fonotaga e tatau ona usu mai i Samoa nei. O le tofia o Samoa e faatino ai nei fonotaga tetele, o se faailoga lea po o se molimau ola, o le lelei pulea ma faamaopoopo le tatou vafealoaloai ma isi Malo, ma isi atunu. O le atagia foi lea o tatou auaunaga faava-i-Fafo. O le tatou sao taua i le tele o talanoaga taua a le lalolagi, faapea le faatupulaia o numera o atunu, ua tatou faipaaga faatasi. O lo o faatupulaia foi le numera o Ofisa o Malo ma Faalapotopotoga mai fafo ua faatuina i totolu o Samoa. O se tulaga taua lea, e maua ai foi nisi o faamanuiaga mo Samoa, e pei o ni galuega mo a tatou fanau. O Ofisa fou e aofia ai, o le Ofisa o le Malo o Peretania na faamuta a tatou fesootaiga i le tausaga e 1973. O lea ua toe tatala, i le taimi lena, na fuafua ai e le Malo o Peretania e ofi atu i totolu o le Iuni a Europa. O lea ua toe alu ese, ma ua toe manatu ai, e toe tatala sootaga faapitoa ia, ma atunu o le Taupulega. 2. O le faalauteleina o le Ofisa o Malo Aufaataasi i Samoa nei. 3. O le Ofisa o le Pacer Plus, Ofisa ia o le feagaiga o fefaatauaiga faava-o-Malo i totolu lava o atumotu o le Pasefika i ni aiaiga faapitoa. O le Ofisa o polokalame faaitulagi, mo atinae o taaloga a Ausetalia. O lea ua silafia, o le tulaga lea e taua tele, sa tatalaina i nai vaiaso talu ai, ia le malie o Ausetalia le faatuina i Samoa nei ia le ofisa lenei faapitoa mo atinae o taaloga mo le itulagi atoa lenei o le Pasefika, ae faatuina i Samoa nei. E ese ai lea ma ofisa aloaia faava-o-Malo, a Malo o Saina, Niu Sila, Amerika, Iapani, Ausetalia.

O le faalauteleina o le avea o Samoa ma sui o Faalapotopotoga faava-o-Malo lau Afioga i le Fofoga Fetalai i atunuu i fafo. O le faaauauina lea Samoa ma ona tagata. E pei o le tatalaina o le tatou Ofisa High Commission i Fiti, pasia le faatuina o le tatou Ofisa i Sineva. Na filifilia mai luga o fono faatonu o le Green Climate Fund, o le UN Women, UNDP Inter Agency Group Experts, faapea foi ma le taitaiina o le fono a taitai o le Forum po o le Faalapotopotoga lea o Taitai o Malo o le Pasefika i le 2017. Ia faapea foi ma le Taitaifono o le Faalapotopotoga lea o atunuu o Aferika, Karepeane ma le Pasefika, lea foi ua see mai ia Samoa i le tausaga lenei 2021.

O lo o faaauauina pea ona i ai sui o Samoa i luga o Faalapotopotoga faava-o-Malo, o faaputugatupe faapitoa mo galuega, faatatau i le atinae. O sina faataitaiga o lo o faaauau foi ona saga faamalosia sootaga ma paaga masani, e faapea le faaopoopoina o ana paaga faava-o-Malo fou. O le molimau ola lea o lea tulaga na vaaia le taupati mai o atunuu e 15, ma a latou foi au o fomai tomai, 45 le aofai, sa fesoasoani i galuega o le foia o le misela i le tausaga 2019. O lona lua, o lo o iloga foi le faatauaina o le sao o Samoa i le avea ai, o Samoa ma taiala i lio faava-o-Malo, e talanoaina ai mataupu taua mo le itulagi lenei o le Pasefika ma le lalolagi. E pei o le fesuiaiga o le tau, pulea lelei o ogasami, fefaatauaiga, uunaia o le toe faaaogaina o auupega gafataulimaina. O le faamaoni o le tatou Malo e lipoti i Malo Aufaatasi o nei mataupu uma i totonu o le atunuu, e matua aoga tele i le sailia o le lagolago mai faava-o-Malo i polokalame, aua le manuia o tagatanuu ona o le taulamua o si o tatou Malo e faatino ana matafaioi, ua noatia ai faava-o-Malo. I le faatino ai o polokalame e tali atu ai i le Koviti-19.

Lau Afioga i le Fofoga Fetalai, o lo o mafai ona faaaogaina i ai polokalame faataatitia mo le mataituna o aia tatau a tagata faapea le ausia o sini eseese mo se atinae gafataulimaina. O le lelei faafoe o le fealoaloai faava-o-Malo faapea le faamalosia o faiga faapaaga ma Malo eseese lau Afioga, e taua tele mo le ausia o sini o taiala mo le atinae o Samoa. E auala atili mai ai fesoasoani manaomia mo i tatou manaoga, e tatau ai ona faaauau le tulaga o Samoa o se paaga e talitonuina ona taitai. E faamoemoeina ma mausali ma toofilemu lona pulega. O lo o matau mai e le lalolagi, e ui o Samoa o se tamai atunuu laititi tele, ae o lo o gafa ma faafitauli o le atinae. Ae peitai, o lo o taumafai pea so tatou sao ma se leo i faiga o tonu o le itulagi lenei o le Pasefika faapea le lalolagi, i mataupu e ono aafia ai lo tatou atunuu ma ona tagata. I le tulaga o le faatinoga o auaunaga mo le vafealoaloai faava-o-Malo lau Afioga, e taua tele le vaega lenei o galuega, ona iloa ai pe faapefea ona faatino ma faamamalu le vafealoaloai faava-o-Malo. O le faatinoga o lenei auaunaga, e matua faalagolago tele lea i taiala i lalo o le feagaiga o le Vienna Conventions. E pei la o le, 1. O le faia o pemitanofomau le tumau o tagata faigaluega a ofisa ma Malo mai fafo, ma Faalapotopotoga faava-o-Malo. 2. O le faamausali o auala ma faiga i lalo o Tulafono, ma faiga faavae, a le atunuu. E mautinoa ai le talileleia o le i ai o sui o nei Malo ma

Faalapotopotoga aemaise o tulaga uma faapitoa, latou te maua, ina ia le faalavelavea le faatinoga o latou galuega, matafaioi, mo le ausia o se tulaga lelei i le vafealoaloai ma Samoa. O le taimi nei ua outou faafogafoga i mea ia ua aafia ai le Iunivesite o le Pasefika i Fiti, ua faamuta ai ma aveese le pule, tipoti ese. Ma ua afaina uma ai le pulega o le Iunivesite a atunu o le Pasefika. Ua faaaoga ai le malosi uiga ese o le Malo. O mea tonu lava ia e faamasino ai e Malo i fafo le talitonuina o se Malo e faatino aloaia, ia ana faiga faavae i luga o le Tulafono. O lo o ogatasi ai ma puleaga o Malo faatemokarasi a le Taupulega, i le soona faaaoga ai le malosi o le power i ni auala e le tusa ai. 3. O le faatino o polokalame mo asiasiga a taitai o Malo ma Faalapotopotoga mai fafo faava-o-Malo e malaga mai Samoa, sainia o feagaiga faava-o-Malo ina ia tutusa ma le le faaituau o le faatinoga o nei auauana, aemaise o le faatulagaina lelei o le auai i sauniga taualoa a le Malo, o sui o nei Malo ma Faalapotopotoga.

4. Saunia lelei o tusi taualoa mo le molimoli aloaia o so o se sui fou o le Malo i atunu o le a auauana ai faapea tusi taualoa mo le tuua o le atunu i le taimi e muta ai le taimi galue.

5. Faasalalau le lisi o sui o Malo mai fafo faatasi ai ma le faatulagaga e ao ona i ai i lea taimi ma lea taimi e fua i le umi o latou auauanga i le atunu.

Ma le 6, auala eseese e faamaonia ai ni pepa aloaia a se atunu mo le mafai ona faaaoga i atunu i fafo e pei ona taialaina i lalo o le HAKE Convention po o le Feagaiga lea i HAKE Faava-o-Malo o le tausaga 1961, e pei o pepa fanau ma pepa maliu po o pepa ua resitala ai se kamupani i totonu o Samoa.

Ona ou oo mai ai lea i le va fealoai faa-itulagi lenei o le Pasefika. E tele tele tele le sao o Samoa i le atinae ma le sologa lelei o le faatinoga o galuega fai e Faalapotopotoga o le itulagi lenei o le Pasefika i le 5 tausaga talu ai, aemaise o le pulega o ia Faalapotopotoga e tagata lava ia o le Pasefika e pei o le Pacific Islands Forum Secretariat, o le Ofisa lea e tautuaina le fono a Taitai o Malo o le Pasefika. Pacific Aviation Safety Office - PASO, po o le Ofisa lea e mataituina lelei le saogalemu o femalagaaiga tau vaalele i le tatou itulagi lenei o le Pasefika. Pacific Islands Forum Fisheries Agency – FFA o le Ofisa lea e mataituina lelei aiaiga o le fagotaina o tatou ogasami. O le Pacific Islands Forum Secretariat, ua uma ona ou taua o le Ofisa lea e tautuaina le fono a tatou Taitai. Pacific Power Association, PPA, o le asosi lea a Malo i tulaga o le malosi e gaosi ai le eletise. Pacific Community – SPC, o le Faalapotopotoga lea faapitoa i tautua e manuia ai atunu uma o le Pasefika. Secretariat of the Pacific Regional Environmental Programme, o le Ofisa Tutotonu lea o lo o latou silasila totoa i le puipuiga o tatou siosiomaga o atunu o le Pasefika. South Pacific Tourism Organisation, o le Faalapotopotoga lea o latou uunaia tagata maimoa mai i atunu uma o le Pasefika o lo o faalagolago i ai o latou tamaoaiga i tupe maua faaagaaga mo feaatauaiga. Pacific Water and Waste Water Association, o le asosi lea e

gafa ma le tulaga o faafitauali o le puipuiga o vaitaumafa o le Pasefika. Ia ma le tatou Iunivesite o le Pasefika i Saute, aua le aoaoina o tatou tama fanau.

I le fonotaga a Taitai o le itulagi lenei sa usuia i Samoa ma taitaia e Samoa i le 2017 na faailoa aloaia ai i Taitai o Malo o le Itulagi le Blue Pacific Identify Narrative, o se faailo lea o Malo uma o le Pasefika ua tuufaatasi i se faalupega, o atunu o lo o i totonu o se konetineta o le sami matagofie lanumoana. O se faalupega e faalupelupe ai faalauaitele i le vaaiga a le lalolagi i le itulagi lenei, ua le na o ni atunu o atumotu taitasi o le Pasefika, ae o se konetineta ua fusia faatasi ma taui ai le agaga o le tutu faatasi ina ia faatumau le sami lanumoana. O lona uiga, o atinae ma gaoioiga uma e faatumau ai le lē aafia o le Pasefika o lo o tatou ola ai, o lo o tutupu ae ai figota o le sami, e fananau mai ai taumafa mo tatou i le taimi nei, ae faapea foi ma a tatou fanau o le lumanai. O lenei vaaiga ua faamausali ai le faatauaina o le galulue faatasi o atunu uma, o se tino e tasi e uunaia itu uma ua ave i ai le faataua ma le faamuamua o le itulagi e pei o le aafiaga i fesuiaiga malolosi matuia matautia o le tau. O le pulea lelei lea ma le tausia lelei o ogasami, o tatou ogasami. Le saogalemu o le tatou itulagi i tulaga tau faigafaiva faapea le tali atu i aafiaga o le Koviti.

O tulaga lautetele ia mo le atinae au i luma o tupulaga fai mai o le lumanai o Samoa, e mamao mamao lava le vaai i le lumanai. O le vaai a le tagata e tu i luga o le tumutumu mauga, ae le o le tutu i lalo o le auvae mauga, na o tafu'e o laau e muta mai ai le vaai. O le taunuuga o nei galuega lau Afioga, o le faamalosia lea o auala e uunaia ai le galulue faatasi o le itulagi lenei, e pei ona i ai taiala mo le piriota e agai atu lava i le 2050 tausaga i le lumanai. Lea na pasia i le fono a matou o Taitai o le Pasefika na faia i Tuvalu i le 2019. O lea taiala na ave ai le faamamafa i le faataua o le itulagi lenei, i auala eseese e mafai ai ona fausia se lumanai manuia mo le itulagi atoa faapea foi tagata uma o le Pasefika.

O itu taua ua ave i ai le faamuamua a le itulagi lenei, ua tuu e Taitai i ai le faataua i aafiaga o le fesuiaiga o le tau ona ua afaina ai le saogalemu o atunu uma lava ma o latou tagata. O le mafuaaga lea o le faamautu o le faalauiloa ua taua o le Kainaki 2. Ma o lo o faamamafa ai le valaau a le itulagi i paaga uma lava faava-o-Malo e aofia ai Saina, e aofia ai Peretania, e aofia ai Siamani, Amerika. O le valaau, ia faia ni faaiuga toa e tali atu ai le lalolagi i aafiaga o le suiga o le tau faapea le taua o le sootaga maloloina lelei o ogasami ma le fesuiaiga o le tau. Aisea? Aua e le aafia ai na o tatou, e aafia ai foi ma latou, e aafia ai a latou fanau. Ae i ai le taumatematega, e faale popole tele i ai latou, ona e tetele o latou laueleele, e mafai ai ona solomuli mamao i uta. Ae a faapefea o latou aai tetele? Afai e magoto o tatou atunu i totonu o le Pasefika ona ua liusuavai le vevela po o le aisa i matu ma saute, magoto uma ai lea o tatou, e magoto uma foi ma latou, o latou aai tetele o lo o tulata i le sami, Niu Ioka, Uosigitone, Lonetona, Sini, Aukilani, Ueligitone. E goto uma i lalo i le sami. O lea foi tatou te tilotilo atu i afi mumu saesae,

fia afe eka, ae afua mai lava i le mea lea e tasi. O Ausetalia, Niu Sila, o Europa, o atunuu o Amerika i Saute, Amerika i Matu, mu faasoloatoa, oti atu ai ma le toatele o tagata. O lona uiga, e le o faapea e le o malamalama latou, o lo o malamalama lelei latou i mafuaaga o nei mea. E malamalama lelei latou o atunuu tetele ia i le fofo o faafitauli, toe pau lava le mea lea e totoe, o le lototele, courage. O le lototele e faatino ai gaoioiga e tatau ona fai. O le mea e faigata ia i latou, a faatino loa, o a mea e faatino ai? Mea ia tatou te faia. Taofi loa le toe faaaoga o suauu nei e aafia ai le lalolagi, taofi le toe faaaoga o le koale. A o latou, o la e ola ai i le mea lea. O lona uiga o le taimi e taofia ai, e aafia uma, tele tagata e le faigaluega. O lea foi la tatou te finau atu, faaaoga le malosi o le la, faaaoga le malosi o matagi, faaaoga le malosi o vaitafe e vili mai ai le eletise. Ae i ai lona, leaga e malosi tele le fai uo o Taitai o Malo ma pisinisi tetele ia.

O lea foi la e afua ai se tala na ou faia faa-ataata a lafoga i mea nei o fesoasoani a le Malo e tuu atu i Vaega Faaupufai, e tatau lava ona sau i totonu o le Malo. O Vaega Faaupufai ua aloaia i totonu o le Palemene, tuu atu i ai ni nai fesoasoani tau tupe e faagaoioi ai Vaega Faaupufai, ia aua ne i faalagolago tasi i kamupani. Aisea? Aua e noatia ai le Malo i ana faaiuga fai, e ono faia ai ni faaiuga le fetaui mo le manuia lautele o le atunuu. Lea sa fesili ai se tasi foi o outou, e tilotilo po o le a se auala e tatau ai ona faaolaola Pati, e manaomia ni tupe. O le Vaega Faaupufai lenei, na tulai mai lava e leai ni tupe na i ai. A o le ki atoa o le mea lenei o le manuia o taumafaiga a se Vaega Faaupufai, o le i ai o ni Taitai e lotogatasiasi, e lotomau, e faamaoni, e le talapepelo, e le faalata. O le eseesege lena. O le mea lena e manaomia i le maopoopoga o se Vaega Faaupufai, e le talapepelo i latou ua omai e faatu se Pati, e talitonuina, e amanaia e le atunuu, e le talapepelo. E leai ma se isi e fiafia i ai i ituaiga uiga ia.

Lau Afioga i le Fofoga Fetalai, o le aso 11 o Tesema 2020, na faia ai se fonotaga tele a Taitai o le Pasefika e uunaia ai taumafaiga a atunuu uma, ina ia tetee atu i aafiaga o fesuiaiga o le suiga o le tau. E tele foi le sao o Samoa i le fausia o le feagaiga o le BOE Declaration mo le saogalemu o le itulagi lea na pasia i le matou fonotaga na usu i Nauru i le 2018. O le faalauiola la o le maliega lea o le BOE Declaration, e faavae lea i le tapenaina o ni auala e tali atu ai i tulaga uma lava e faamausali ai le saogalemu, le puipuiga o le saogalemu o tagata, o fesoasoani mo tagata i taimi o faalavelave faafuasei, o le faasaogalemuina o le siosiomaga faalenatura ma soligatulafono tau le initaneti. O lo o faafeagai lelei le BOE Declaration ma faiga faavae mo le puipuiga saogalemu o Samoa. O le matautia o puipuiga mai le faaaogaina o fesootaiga, lea ua tatou tilotilo atu i ai, faaaoga sese i le ave ai o ni faamatalaga taufaavalea, faamatalaga le moni, e le sao. E faamamafa le taua o le i ai o se leo tuufaatasi ma le malosi o le itulagi i tulaga o lo o ave i ai le faamuamua, aemaise o le mulimulitaia lea o tulaga taua o lo o faailoa atu i taiala o le atinae mo atunuu taitasi, o le faiga ua faavae ai fonotaga faaitulagi

a le Pasefika ma Iapani, lea e faaigoaina le fono lenei o le PALM 2019. E faapea foi Korea i Saute, Pacific Korea Foreign Minister's Meeting, na usuia i le 2017 ma le Malo ma le fono foi na usu ma le Malo o Saina, o le China Economic Forum 2019, na tauala atu foi i polokalame o galuega a Faalapotopotoga o le itulagi lea e faaigoa o Corrupt Agency le sao o Samoa i auala e saga faamausali ai le galulue faatasi. O se itulagi e tusa ai o tatou galuega tau le atinae, ua ave i ai le faamuamua e pei ona faalauiloa i le Taiala mo le Atinae o Samoa 2017 i le 2020.

Lau Afioga i le Fofoga Fetalai, o lea ua ou vaai atu, e le o toe umi. A umi pe toe 3 itula. A o lea foi ua oo i le taimi ua ou solitulafono ai, ua ova ma le taimi e malolo ai faipule. Ia, o le tuutuu atu lea i lau Afioga, pe ni a fa, ou te alofa i faipule leaga e le i koleni mo taimi faapenei. O au e mafai lava ona ou tutu mai lava nei ma taeao ma talaatu a taeao.

SUI FOFOGA FETALAI: Faafetai i lau Afioga. Ua faamalo saunoa i lau Afioga i le Taitai o le Malo. E i ai le manatu ua taliga i tuliau ma ua logologo pualilo nai olo. O le ala lea i le faafogoa a le Maota ma le faafogoa tapuai mai a le tatou atunuu. O le ala lea o le le fia faalavelave lava, ua tutupu lava matagi i liu o vaa i lagona o lenei taeao i le taua, le taua o le folasaga a lau Afioga i le Taitai o le Malo, o la e fia maua mai e le atunuu, aemaise tagata e tatau ona malamalama ae le fia malamalama. Ona i ai lea o le manatu, faafetai manatu mai i le Nofoa ma le galuega, toe faaauau lau saunoaga matagofie pe a toe taliu mai le Palemene i lana malologa.

Talu ai o lea ua taunu le Maota i le tulaga masani o lana malologa pei ona masani ai i lea aso ma lea aso. Ou te faasilasila atu, o le a faataatiaeise Galuega a le Maota mo lana malologa e 15 minute toe taliu mai ai toe faaauau le saunoaga a le Taitai o le Malo. Ma le faaaloalo.

Na faataatiaeise Taualumaga a le Fono Aoao Faitulafono i le itula e 10:46 i le taeao ma toe faaauau i le itula e 11:36 i le taeao.

Na toe faaauau felafolafoaiga i luga o le faiatauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.

SUI FOFOGA FETALAI: Ou te faasilasila atu ua toe amatalia nei Taualumaga a le Fono Aoao Faitulafono.

Ou te manatu o lea ua matu i fau le taligasua a le paia o le Maota, aua le afio o lau Afioga i le Palemia o le Taitai o le Malo, le paia o le Kabeneta, ae a le afifio o sui usufono mamalu o le Palemene o le Fonousu a le atunuu. Ua nofofale foi i le aiga Satuiamaa le silasila ma le tagai a le Maota i lenei aso,

i le maualuga o le amanaia, ia ma le faaaloalo a o usuia ai le Fono a le Palemene.

Ona i ai lea o le manatu, o se laolao lelei lenei e fai ai lou leo faatauvaa e fai ma fofoga o le Maota o le Palemene o Samoa e momoli ai le faafetai tele ma le faamalo i lau afioga i le faletua i lau afioga Vaelaa, o le faletua o le afioga ia Vaafusuaga Toleafoa Ken Toleafoa Poutoa, aemaise o ou aiga ma le nofo a alo. E a lenei aso ua maualuga la outou faaaloalo. Faafetai i le manatu mai i le Fonousu a le atunu. Ae ua matou manatu e faigata paia aua le Aiga Taulagi. Le Matua o Satuala ae a Usoalii ma Gafa. Faafetai tele. A o le lauga a tootoo o Maauga ma lo outou Toafa. Faafetai le manatu mai.

Ia, tainane foi le susu o Ie e lua, Taofia ma Usoalii, e faapea foi le alaalatai o oe Salelesi ma lo outou Toafa ma le nofo a Ituaiga ia Saoluafata. E le tauilo tupu i ana aga faatupu, a o tamalii foi i aga faatamalii. Faamalo le faaeaea, faafetai le tautua malo. I le usuia ai o le Fonousu, ia, lea ua tali le sua, ua taumamafa ua laulelei, ua inu foi ua tofo malie la outou faaaloalo. Ae a sa matou tala e fai atu i le aso? Tau ia ina o matou faapea, le Alii e, le Atua o tamaoaiga, ia toe faatumu le tamaoaiga ua lafoai i lenei aso ona o lo outou alofa ma lo outou agalelei i lo outou atunu i ona Taitai filifilia. Ia faamanuia le Atua i le paia o aiga e lua, aemaise lau afioga i le faletua.

E faataatiae galuega a le Maota o saunoa le Taitai o le Malo, le Afioga i le Palemia i lana saunoaga matagofie. O le mea lea, ou te toe tapa ma le faaaloalo lau Afioga i le Taitai o le Malo e tulai mai faaauau lau saunoaga matagofie. Ma le faaaloalo.

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ia, o le a le toe agai i utumaa se faamatalaga, o lea ua saunoa lau Afioga. Ma o le a fana tonu loa le malama ma vili tonu le ifi a Maina aua le faamoemoe e pei na taumafai atu ai le Malo i le faamalamalamaina o nisi foi o mataupu e le gata e tali atu i saunoaga i totonu o le Maota, ae faapena foi ma fafo atu o le Maota, o lo o faafogafoga i ai le atunu, ma o lo o fia maua foi ni tali o ia manatu faaalia.

Ou te manatu o le a ou agai atu loa i polokalame faaitulagi mo le siosiomaga. O lo o ua faatu nei i Samoa le nofoaga tumau tutotonu o le itulagi lenei mo le puipuia o le siosiomaga, SPREP, faapea ai foi le nofoaga o le tatou itulagi lava lenei ua faapitoa mo mataupu tau le fesuaiga o le tau. E lua nofoaga tetele taua e agai tonu lava i le mala o lo o afaina ai le lalolagi atoa. O le nofoaga faava-o-Malo mo fesuaiga o le tau, o le taunuuga lea o faamoemoega uma o atunu ina ia aoaoina tagatanuu o le Pasefika ia lava lo latou tomai mo le silafia i polokalame faale-aoaoga, suesuega faa-saienisi ma sootaga vavalalata e saili ai ni tali, tali mautu i manaoga mo le atinae o faiga eseese e tali atu ai i nei aafiaga, aemaise o le tuuitiitia o le aafiaga o le tatou siosiomaga. E taua loa le siosiomaga, ona ou manatua lea o le saoasaoa

o tatou fuafuaga mamao tau le atinae tau faatoaga, i le uunaia o le totoina o le niu, o le koko, o le talo. O upu lava ia sa masani ona sausaunoa i ai Taitai o le atunu i totonu o le Palemene lenei, gagau le vao, gagau le vao, atiae faatoaga, e aunoa ma se manatu i le afaina o le siosiomaga sa soona ta ai le vao. A o le i tutupu ia mea sa malolosi le tatafe o vaitafe, e leai ma se manatu agai i le afaina o le siosiomaga.

O le tausaga e 1973 a o faasolo lau faitauga o meli e sau i totonu i le matou Matagaluega o le Atinae, e 48 tausaga talu ai na ou tau ane ai i le faasilasilaga mai le Malo Aufaatasi, o moomia se usugafono mai Samoa e auai i le uluai fono e tilotilo i le mea lea ua agai i ai mafaufauga sa le i amanaia, ua aafia le siosiomaga, aafia le siosiomaga, mai le taimi lena e faasolosolo mai ai seia tau mai i le 1990+, pei faatoa amata loa ona tulai mai le malosi o manatu i le faalavelave lea ua tupu. Ae na amata matauina i le faasalalauga mai, ua afaina le osone, ua pupu le osone se i tulou, o le afuafu lea e puipuia ai le lalolagi e le Atua, e taofiofia ai le soona malosi o le susulu mai o ave malolosi o le la asaasa ma mamai ai tagata ma mafanafana ai le lalolagi. O le tausaga foi lea e 1982 i le uma ai o le faiga palota, faatoa ou matauina ai, ua ese le mea lea ua tulai mai, ona e i ai ou ulu sa toto i le faitotoa o lou fanua ou te agai atu ai i totonu ma ou sau i fafo, ma o taeao uma lava ou te tuua ai le matou aiga, o laau lava ia e mulimuli ou vaai i ai, o le ulu, o ou ulu ia. Ma o laau foi ia e muamua lava ou vaai i ai pe a ou alu atu. Ua leva ona faagasolo fonotaga ma Ofisa Sili o Pulega o Matagaluega i le taimi mai le 1970 sa matou fono fono ai pea, aemaise le Matagaluega o Faatoaga, e tau aumai ni ulu faapea, e maua i Hawaii ulu e fua faalausosoo. Ma ua tele ulu e aumai, na ona aumai lava o a i le ituaiga fua lea e fua ai ulu i Samoa nei. A tasi lava le fuata i le tausaga, e tasi foi le fuata ulu e aofia ai ma ulu ia sa aumai. E alu uma lava i le taga e tasi. A le uma ai o le faiga palota i le 1982, ua ou te i lava i lou alu i le fale ae ou tilotilo atu, o le ulu lea e uma ai le fuata, a ua ou vaai atu loa ua oso mai fune o le isi foi fuataga. Ua matua ou te i ai lava i le aso lena ma ou faapea, o le mea sa matou taumafai i ai le toatele o matou sa i le service i le taimi lea, e tau faatupu ni ulu faapea e uma atu le isi fuataga ae sosoo ma le isi fuataga. O le 1982 lena. A o le 1987, na alu ai le matou malaga a le HRPP i Amerika ina ua avea le matou Vaega Faaupufai o le Itu Agai. O le foi mai la mai Amerika agai i Hawaii. Na ou tilotilo ai i le nusipepa ma ou faitau ai, e tusa e 4 itulau tetele faatoa sau ai se faamatalaga tele faasaienisi, o lea ua maua nei e saiennitisi ua pu le afuafu lea o le ozone, o le 1987 lea, ma ua afaina le lalolagi, i le vevela. Ona ou mafaufau loa lea i le 1982, lea na oso ai le fua faalausosoo, o lona uiga, o le amataga lena o le aafiaga o Samoa i fesuiaiga o le tau. E mai le 1982, ae 1983 ae oso loa ma le mu i Savaii. O le faatoa mu lena o se vaomatua e mata, ua aafia Samoa i le vevela ua aafia lo tatou siosiomaga. O lea la ua oo mai i le taimi lenei, ua outou faafofoga, i le anoano o le mau gaoioiga ua fai. E fai ma sao o Samoa i taumafaiga a le lalolagi ina ia taofia le mala lea o le suiga

o le tau. O nisi o mataupu o lo o faatautaia e le Faalapotopotoga lenei o le SPREP mo Samoa, e aofia ai otaota o lo o soona faatafea mai o tatou vaitafe agai atu i ogasami. I le oona maoae o sua ia e faatafe atu. O sua o vailaau fanavao, aemaise foi o suavai tiasi, lafoai mai falegaosi oloa. O lo o tafe atu i alavai ma aafia ai o tatou ogasami, faatasi ai ma taiala o le puipuiga o le siosiomaga, ma o tatou sami mai le faaaaogaina o pepa uga, ma otaota eseese e le mafai ona pala. O le faatinoina o taaloga a le Pasefika, e faamamafa ai le le faa-lanumeamataina o le siosiomaga. O lona uiga o se faatosina, ina ia faalanumeamata. A o le le faalanumeamataina o se avanoa lelei lea, sa faaaaoga ai e taaloga lenei na faia i Samoa nei. E faailoa atu ai lautele, le taua tele o le puipuiga o le tatou siosiomaga ma taofia ai le faaaauauina masani, e faatupu ai otaota faalafua. O tulaga i le Ofisa lea tutotonu o femalaiga a le Pasefika, po o le Pacific Immigration Development Community, PIDC. O le Ofisa lenei, na faatuina i Samoa i le 2016, o le isi lea ofisa taua o le itulagi ua sii mai i Samoa. Ua galulue faatasi ai ma isi Ofisa, e pei o le nofoaga tutotonu o le Pasefika, mo le mataitu o soligatulafono i le va o atunu, o le itulagi ma isi atunu o le lalolagi. E faapea le Ofisa mo le faalapotopotoga o ofisa sinia e galulue i ofisa e faafoeina Tulafono a se atunu. O lo o fesoasoani tele nei ofisa i le faatinoga o le tatou galuega mo le puipuiga faale-Tulafono i Samoa nei.

Ona ou oo mai lea i le Pacific Community po o le SPC o le Faalapotopotoga o lo o gafa ma le atinae o tagata lautele o le atunu i totonu o atunu o le Pasefika. O lo o gafa le Faalapotopotoga lea ma atinae o aoaoga, soifua maloloina, aia tatau a tagata faapea foi mataupu tau tupulaga talavou, o aganuu faapea le tulaga tau faatutusa o avanoa i le va o alii ma tamaitai. O le SPC, ua fesoasoani tele lea i le maua ai o faamatalaga faasaienisi e faavae polokalame mo le atinae o faiga faiva. O le mataituna o faamai pipisi i le itulagi faapea le puipuiga o faamatalaga eseese ma faamaumauga taua i talaaga o laau toto, ina ia faatumau se faavae mausali, mo taumafa eseese mai laau nei a atunu taitasi. O le taulamua lava o Samoa, i le saunia lea ma le tuuina atu o uluai lipoti i Malo Aufaatasi i le faatinoga o sini ma atinae gafataulimaina, faapea le faailoa aloaia, o le Blue Pacific Identity. O le Blue Pacific Identity o atunu uma o le Pasefika, o se konetineta lanumoana. Ua avea lea ma faataitaiga, o le avea o Samoa ma taitai i le itulagi, ua avea ma auala e tali mai ai Malo Aufaatasi ma isi paaga. E faatino mataupu ua taulamua ai Samoa. E faapea tulaga e faataua ai mo atunu o atumotu, ona o se Malo, ua muaimalae, o Samoa lea i saofaiga, saofaiga a Malo i le Pasefika. E aloaia, e amanaia, e talitonuina, e faatuatuaina, e toofilemu ana pulega, o ana tu ma ana agaifanua. E taua tele lea laasaga, e fesoasoani ai i le mau a nei atumotu e tatau ona faapitoa ni polokalame. E lagolago ai le faamaninoina o aafiaga o le maaleale tele o le siosiomaga faale-natura faapea le atinae e pei faamamafaina i le Samoa Pathway. O le Samoa Pathway, o le faalupega lea faalauaitele, e faailoa ai i le lalolagi, le polokalame o atinae a

atunuu tau atiae o le lalolagi, na pasia aloaia i le fonotaga a le Malo Aufaatasi, na usuia i Samoa nei i le tausaga e 2014. Na auai ma le failautusi aoao o le Malo Aufaatasi, sa tatou le i mafaufauna, e ono oo mai le failautusi aoao o le Faaao o le Malo Aufaatasi i Samoa nei. O lea na to ai le faaaloalo ma faaigoa ai se suafa matai faava-o-Malo mai tua i atua. O lo o taulamua foi Samoa i le faalauteleina o le taua o pulega saoloto, o atunuu o le itulagi. Ina ia fai ai a latou faaiuga, po o ai paaga latou te galulue faatasi i lenei vaitau, o le lolofi mai o atunuu tetele i le Pasefika e saili, po o ai e aupito tele atunuu e lagolagoina e latou. E le gata i lea, e ao foi ina faamamafa le taua o faaiuga tuufaatasi. O maliega uma ua malilie i ai atunuu o le Pasefika e tulei ai so o se latou mau, aua le manuia lautele o tagata o le itulagi lenei o le Pasefika. O lo o faaauau foi ona faufautua Samoa, i le lagolagoina o Faalapotopotoga a le itulagi, ina ia mafai ona faatino auauanaga mo atunuu uma, aemaise ai o le faaaogaina o nei Faalapotopotoga mo polokalame eseese, a le itulagi na i lo le tuuina lea i nisi Faalapotopotoga faava-o-Malo. Ma ono oo ai ina faaluafesasi matafaioi ma maumau ai punaoa utiuti o lo o tatou taumafai e tauva i ai. O lo o faaauau foi ona auai Samoa i le tele o talanoaga e toe lauliliu ai auala e faatino ai galuega, i le itulagi ona o le aafiaga o faamai oti, aua ua utiuti punaoa mo atinae faaitulagi faapea foi atinae faalotoifale a atunuu taitasi. O le a le uiga o ia mea, o lea ua tatou mataituina le matua aafia o atunuu uma o le lalolagi, i faamai. Ua tapunipuni le tele o falegaosi oloa, o galuega e maua ai tupe a tagata. O lona uiga ua amata foi ona faaifo le niu i le lapalapa, ua amata ona vaai puupuu Malo, i o latou manaoga e ave i ai le faamuamua. O lona uiga o se lapataiga ia i tatou, e tatau ona tuutuu mamao le faatofalaiga i fuafuaga mamao. Ua matua le toe ofi ai se faatosina o ni fuafuaga soona fai. E faigofie tele ona ooti le taimi lenei, o lo o faafeagai ai le lalolagi ma faigata. O le vafealoaloai, e faataua i le tulaga o fefaatauaiga, o le maua o avanoa lau Afioga i le Fofoga Fetalai e Samoa, e faaulufale atu ai ana ia lava oloa gaosi i maketi i fafo. I le Iuni o Malo o Europa o Peretania, Ausetalia ma Niu Sila. Ua faamausali lea e ala i le auai o Samoa i maliega tau fefaatauaiga e pei, o le Pacific EU Interim Economic Partnership Agreement o le 2019. The Pacific UK Interim Economic Partnership Agreement o le 2021 o le tausaga lenei, and the Pacific Agreement on Closer Economic Relation, PACER Plus 2020. O le PACER Plus, le maliega lea mo le faatinoga tau fefaatauaiga i ni aiaiga e faafaigofie ai a tatou oloa ona ave i fafo. O se taumafaiga ua leva tele. Sa galue ai le Afioga i le Minisita o Joe Keil i lena taimi, i le umi o faia faatalanoaga. Ona oo mai lea o le Afioga ia Fonotoe, o faaauau pea, lea ua oo mai foi i le taimi o le Afioga i le Minisita ia Lautafi, o faaauau pea. O lea faatoa maua le finagalo autasi. O le mea o le faigata, e faigata i atunuu ona vaavaai mamao, ona taumafai e paleni le tulaga, e tatala mai ai le avanoa i oloa a se atunuu. Ma tatala ai foi le avanoa o oloa a se atunuu i au paaga o lo o fia fai sa outou maliega, i le itu o le avatu, aumai. E fetuutuunai o le tofa

mamao, e i ai mea e tatau ona e foai, e i ai foi mea e tatau ona foai e la atunu, e pei o se mu foai, le faatinoga o faatalanoaga nei. E toa-tolu lelei Minisita, e 15 tausaga o faagasolo faatalanoaga nei, i le faigata, ma oo mai ai i luga i le fonotaga a matou o Taitai o Malo o le Pasefika. Ma toe uunaia atili ia Minisita ma toe autilo ma toe tilotilo, ma tuutuu i le loloto le latou tofa fetala'i. Aisea? Aua o upu a le atunu, "o le uta a le poto e fetala'i." O le faatinoga o le soalaupuleina ma feutagaiga na fai mo nei maliega. Na maua ai le avanoa lelei e toe iloilo ai faiga faavae mo fefaatauaiga, ma vaavaai i vaega e tatau ona toe faatulaga i le fuafuaina ma le faatusatusaga i tulaga o i ai fefaatauaiga a le lalolagi, ma le talafeagai ma tulaga o fefaatauaiga i Samoa nei. O lo o mafai ona faaofi aafiaga o le Koviti-19 i faatalanoaga tau fefaatauaiga. E pei foi ona faia ma isi vaega maoti o le tamaoaiga, ma o se isi lenei o galuega tau amata mo le maliega o le PACER Plus. Lau Afioga i le Fofoga Fetalai ma le mamalu o le Maota, ua mafai nei e ala i nei maliega ona faamalosia le vafealoai tau fefaatauaiga o Samoa ma ana paaga. E ala i le faatinoga o aiaiga o nei maliega, ae faapea foi le atinae o ni avanoa e faalautele ai tatou fefaatauaiga, e ala lea i polokalame o fesoasoani ma paaga. O se luitau, o se luitau taua tele lea e ao ina tatou mataitau ma le totoa, le vaai i ni auala e faaaoga tatau ai fesoasoani faapitoa, mo fefaatauaiga o lo o faaagaga mo Samoa. O le fua taualuga lea o fesoasoani e soloai mai i Samoa, faaaoga tatau, faaaoga tatau, faaaoga tatau le malosi o le au totogi lafoga a ia foi Malo, ua aumai tatou te faaaogaina. Sa fesili le tamaitai faipule le Sao Faapito, i le la vaiaso, e fia malamalama. E po o le a le mautinoa, o le faaauau o nei fesoasoani mai fafo, o le fesili, ua ou te i ai, i se tasi ua leva ona saofai i totonu o le Kapaneta. A o lea e tau fesili, e alu atu i fafo, toe fesili mai. O le a le mautinoa? O le tali, e matua leai, leai, leai, toe leai se mautinoa o le faaauauina pea. Aisea? Aua e faalagolago fesoasoani nei, i le tulaga o le sologa lelei o tamaoaiga o atunu i fafo, o paaga. 2. O le silasila mai o latou ia mai fafo, o lo o faaaoga tatau a latou fesoasoani o lo o aumai. I le taimi lenei, i Faalapotopotoga uma nei, ua fua mumu atoa a latou faamaumauga, ua fua mumu uma. O lea sa saunoa i ai le Sao Faapito, ua mumu faasoloatoa fua ia latou lautusi. Ua lapataia, silasila e i ai mea e ono tutupu pe a sui le Faigamalo. I ni fuafuaga faivavale, i le manao i le ia ae le manumanu i le upega. Lau Afioga i le Fofoga Fetalai, o lea la sa saunoa le Sao Faapito i fua mumu o le misela, a o mea ia latou te faia, ua mumu atoa ai fua a Malo lenei, ua lapataia, ua lapataia i le le faautautaga tatau. I le a le tulaga? E oo i ai ia a latou faiga upufai ua nofo tapena, mo ni tonu tatou te le fia faalogo i ai. Aisea? Aua foi o le natura lea o le soifua, o le natura o le soifua e fua ia te oe. A e fesoasoani i lou uso, ae vaai atu ua alu ave ia le seleni na toto mai ia te oe, inupia ma onaona ai. O le a la le mea e fai? E toe sulu mai e te toe avea i ai se fesoasoani? E leai se mea. E te le fia avea i se tagata faamaumauoa, e te le fia avea i se tagata e le faatuatuaina. O le mea moni lena lau Afioga, ma o le faamaoniga mautu o le

faatuatuaina o fuafuaga uma. O le sau pea sau pea sau pea, o le fesoasoani o lo o tafe mai fafo. Aisea? E leaga o lo latou iloa o le Malo o i nei, o le Malo o lo faavae lelei ana faaiuga fai. O lo o tautuaina e tagata atamamai ua foi mai, ua aoaoina i Faalapotopotoga ua lauiloa i latou i fafo, o latou nei sa latou galulue faatasi. O lona uiga ua latou iloa ua malamalama lelei, tama fanau a le atunu. E faataoto tonu fai mo le manuia auluma o Samoa. E le mafai ona malamalama i ai, ia se tagata e le i au e le i oo lona malamalama i le maualuga lea ua i ai le aufaigaluega a le Malo. O le polokalame o galuega faatino mo le PACER Plus faapea foi le polokalame a le Iuni a Malo o Europa e fesoasoani i polokalame, mo le lelei o le tamaoaiga a le itulagi lenei a le Pasefika. O le lagolago i fefaatauaiga a Peretania ma le itulagi, faapea atinae o lo o faaauauina i lalo o le PACER Plus, faapea le polokalame o lo o lagolagoina auala e faatupulaia ai ma faafaigofie ai fefaatauaiga. Ua tatau ona faavae ai, se faafanua mautu mo Samoa pe faapefea ona faaaogaina e Samoa ina ia tali ai ona manaoga tau fefaatauaiga. Ua tele le sao o faiga faavae, tau fefaatauaiga i le ausia o tulaga ua ave i ai le faamuamua a lo tatou Malo, mo le tamaoaiga o Samoa. E pei o itu tau faatoaga, faiga faiva, o oloa e auina atu i fafo, o atinae o tagata maimoa mai fafo, faapea le atinae o vaega faipisinisi. E le gata i lea, ae i ai foi aafiaga o nei faiga faavae, i le tulaga ua faatinoina mo le manuia lautele o lo tatou atunuu. I aoaoga, o le soifua maloloina, o le soifua manuia o tagata, o atinae tetele mo le faatupulaia o le tamaoaiga e pei o faiga faatekonolosi mo fesootaiga faapea aafiaga o le siosiomaga, i fefaatauaiga. Ua alagatatau ai ona faatino faatalanoaga i le va o vaega maoti taitasi, faapea totoga eseese o pulega a le Malo ma pisinisi tumaoti. Ina ia tofusao i le saunia o ni faiga faavae lelei.

Ua tatou mataituita i le tulai mai o le faamai oti, ua matua tapuni uma fesootaiga, e oo i le nofo valavala. E oo lava i le taofia o femalagaaiga i faleoloa, ona o le maoae o le pipisi, e oo lava i le o i lotu. O le a la le ituaiga soifua na tatou ola ai? E pau lava lea o le mea na mafai ona faagasolo ai le tatou soifuaga, ia tau faafetaui e le soifuaga o aso uma. O le faaaoga loa o fesootaiga televavave, ua mafai ai ona faaauau faigalotu, ae nofo mai i le fale. O lea foi ua tulai malosi mai le isi faiga fou, e fesootai mai le atalii mai Peretania, i le faleoloa i Samoa nei, kiliva mea ia i le faaiuga o le vайасо i ou matua, o lo o nonofo i Satapuala, po o lo o nonofo i Aleipata, i Lepa, ia po o le nonofo i Luatuanuu. Ia ave i ai mea na, e totogi sao mai lava e latou, i le faleoloa ae kiliva e le faleoloa. O uiga ia o le soifuaga lea ua i ai. E le taumate e tele nisi ituaiga pisinisi fou e tulai mai, talu mai le mea lea ua tupu, o le ono aafia o le lalolagi atoa i ni faamai faapenei. Ae o le a agai loa e develop le IT, Information Technology. O fesootaiga televavave, i nisi ituaiga tautua, e le o mafai ona mafaufauna i le taimi lenei. O le internet, faatoa tatala mai i tua, o le aupega tau, tau taua, sa fausia faalilolilo e Amerika, i ni tulaga o taua faaniukilia. Ae faasagasaga tasi ia Saina ma Rusia, taimi o le vevela o pulega faa-Kominisi. Na amata mai i le 1990 i le

1991, na malepe ai le faa-Kominisi, i totonu o Rusia, ona faatoa tatala mai ai loa lea e Amerika, le latou meatau faatonutonu. E faatonutonu ai meatau alualu mamaao le internet.

O le tausaga e 1995, na fono ai ia Minisita o le PATA, Pacific Asia Travel Association, a o ou Minisita o Turisi. Na lauga ai le tagata e igoa ia Surf, o ia lena sa pulea le fausia faalilolilo o le aupega tau lea a Amerika o le internet. Na lauga ai i Aukilani i le matou fonotaga, ma ia taua mai ai ia matou. O lea faatoa tatala mai le mea lea. O i ina na amata ai loa le tatou tapenapenaga, ina ua ou foi mai, mo le talepeina o tatou Tulafono. I le tausaga 1999, sa tamau ai faatasi ia le tulaga o le IT o le falemeli ma ueaalesi. Ma aveese loa ina ia tuu atu i tua e faagaoioi loa faapisinisi. Ina ia mafai ona atiae a tatou fesootaiga ma mafai ai ona tatou maua le malosi lea o fesootagai malolosi, e faaaoga, mo le atinae o Samoa. O i ina tonu lea na faatoa ofi mai ai loa le Digicel ma le SamoaTel ua faatuina mulimuli ane, ua tauavea nei e le Vodafone. Ae na amata mai i, i le fonotaga sa fai i Aukilani, na lauga ai le tagata e igoa ia Surf, o ia lea sa faauluulu i ai ia le aupega lea o le internet. Ma o le ala lea o lea e faaigoa ai lona igoa i le faagaoioiga o internet pe a fai e te fealuai e sue le mea e te manao i ai. Ona faapea lea o le upu, “surf the intenet” e tauave ai lona igoa e manatua ai. O ia na faatuina le ituaiga aupega lea. Sa valaauna e le tatou Asosi e le tagata lea ma sau i Samoa, Asosi o IT i Samoa nei, ma saunoa ai, i le afiafi i le faaafe sa ou auai. Ua ou taua itu ia, ona o le vaai agai i luma. O le atinae o le lalolagi, i le vaai mamaao, o i e centre i ai i le lumanai. I le vave o fesootaiga o le a faaaoga i pisinisi eseese, falemai, aoaoga, faatoaga, fefaaagaoioiaiga o pisinisi, o fesootaiga televavave, e faamoemoe i ai. O le ala foi lea na matua tatou o ai, faatino le poloketi tele lava, faataoto mai ai nei ia fesootaiga ia o ueae e alu i lalo o le sami. O lea la ua fua mai, ma ua tele lona aoga, e oo lava i telefonu ua mafai nei, ona fesootai Samoa i so o se itu o le lalolagi. O le a le mea lea ua tupu, ua tupulua lava le saito ma le titania. O se faamoemoega lelei na fuafua e faaaoga e le tagata e talanoa atu ai i fanau ma ua faaaoga foi, e faaleaga ai taumafaiga a le tatou Malo, ma faatupu ai le vevesi. O lea foi la ua galue i ai lo tatou Malo, ina ia faataoto aulape ina ia tuu itiitia ai ia le faaaoga sese o mea nei, aemaise le aumaia o ata leaga, e matamata i ai fanau e faatupu ai le amio leaga o fanau.

O nisi o vaega taua e ao ina faatino i le lumanai, e aofia ai le faatinoga o le faiga o pisinisi e faaaoga ai le internet e moomia ai tagata e nafa ma le faatonutonu tatau faale-tulafono, faapea e nafa ma auala e faatino tekonomosi ma le 2 fefaatauaiga o auaunaga, e aofia ai ma le atinae o tagata maimoa mai i fafo, ma le 3 o le atiae o atamai ma agavaa, lea ua faaaogaina nei i fonotaga faava-o-malo. E tatou te le tau o ai i fafo, ae ua mafai ona faga atu lava i Samoa nei, le lauga a Samoa i saofaiga a Malo tetele o le lalolagi.

O le vafealoai faalotoifale ma Paaga o lo o faatino nei, nei galuega, o lo o ave i ai le faamamafa, i tulaga e faataua ai so o se auala e maua ai e Samoa

fesoasoani mai ana paaga aua ia lo la atinae e ala lea i fefaatauaiga polokalame o atinae o le tamaoaiga. Faiga faapaaga ma le saogalemu o le atunuu aemaise sootaga faale-tagata. O le matafaioi o le Matagaluaega o le Va i Fafo, e feutagai ma paaga uma lava tau i le Malo, tau Faalapotopotoga, so o se auala e faatino ai ia faiga faale-uo i le va lelei o Malo ae e le faapito tasi i polokalame o fesoasoani.

Lau Afioga i le Fofoga Fetalai, o faiga paaga ia e pei ona i ai nei, ua mafai ona faatino ai galuega e tau i le saogalemu po o le puipuiga o le saogalemu o aafiaga o le fesuiaiga o le tau. O le faatupulaia o le tamaoaiga faapea foi sootaga faale-tagata ina ia maua e tagata uma se olaga manuia. A matau mai i galuega o lo o faatino e le Matagaluega lenei o le Va i Fafo, e lautetele, lautetele tele. Ma oooo atu lava e feuluuluai ma gaioiga o lo o fai foi i isi Matagaluega. Matagaluega tau Faatoaga, Matagaluega o Vaega Tau Fagotaga, Aoaoga Tau Sikolasipi faapea foi ma Soifua Maloloina ma e lautele, faapea foi ma le Matagaluega o Tupe. E lautele lava ia le apaapa atu, o le Matagaluega lenei, aisea? Leaga e tasi lava le sootaga o le Malo ma atunuu i fafo ma le tele o Faalapotopotoga. E tasi le auala e tasi le faitotoa, o le faitotoa o le Matagaluega o le Va i Fafo.

O le Matagaluega foi o Tupe e auala uma atu ai ia fesootaiga tau tupe i le va ma Faalapotopotoga tau tupe. O lo o faaaauauina pea foi ona faatino feiloaiga faale-tausaga mai paaga eseese, ina ia iloilo ai le tulaga o le faatulaga o galuega o fesootaiga faale-lotoifale. O nei foi fonotaga, e faailoa aloaia ai e paaga ia ni suiga o latou faiga faavae e pei ona i ai i le taimi nei mai i Malo o lo o tatou galulue feoeoeai. E tai o lenei, taiala a Niu Sila o fesoasoani, o lo o faaupu i le faalupega lautele o le Pacific Reset. O taiala Ausetalia o lo o faaupu i le faaupuga lautele o le Step up, taiala a Peretania, o le Pacific Uplift, ma taiala a le Malo o Saina, o le Belt and Road Initiative.

Lau Afioga i le Fofoga Fetalai, ina ia atoatoa le pitolaau i le faatinoina o nei faigapaaga, ua mausali ia le tapenaga a Samoa, o auala eseese e faailoa ai i paaga le tulaga lelei ua i ai faiga faavae ma auala e faatino ai galuega e tauala mai i a latou fesoasoani, ina ia mausali ia lo latou faatuatuaga i le lelei ona faaaoga o nei fesoasoani.

O le faavae o le toe faatulagaina o Samoa, o se atunuu e maualalo le atinae, i le 2014. O le faailoga lea, ua gafatia e Samoa ma lona Malo le taitaiiga o lona atinae. Ua le toe faalagolago atoa ai i nisi Malo mo lea tulaga. O le 2014 i le masina o Ianuari na faailoa ai e le Malo Aufaatasi, ua siitia nei Samoa ua le toe i ai i totonu o Malo, le saofaiga o Malo matitiva. Ua siitia lona atinae to a middle income level country. O le itu taua o lea tulaga, ona ua mafai ona tali mai paaga, e tauala mai i le tatau i le faamatuu mai o fesoasoani auala eseese e mafai ona fetuutuunai ai e Samoa le faaaogaina tatau e tusa o tulaga ua ave i ai le faamuamua e pei ona faalauiloa i le taiala o atinae o le tatou Malo.

E le gata i lea o le tatou i ai i aafiaga o le Koviti-19, na talia lelei ai e tatou paaga ia le talosaga na tuuina atu, e toe fesuiai polokalame o fesoasoani ina ia mafai ai ona faatino le tali atu i fesuiaiga faifai pea o lo o faapea, o lo o faifai pea, ia faapea le faamai oti ua afaina ai tele ia le tatou tamaoaiga.

O le faatino lelei la o tatou faiga faapaaga, ma o tatou auai ai i so o se talanoaga faava-o-malo, ma faailoa ai ia lo tatou sao, ua avea lea ma auala ua mafai ona tatou maua fesoasoani mo vaega maoti e 15 lea ua vaevaeina i ai le atinae o le tamaoaiga. O lo o faaaauauina ona ave le faataua faapitoa a lo tatou Malo o ia fuafuaga i le Vaega o le Soifua Maloloina ma aoaoga ona o faigata o lo o tatou i ai ai nei, faapea foi le tulaga maaleale o lo o i ai le Pulega o le tatou Iunivesite o le Pasefika, ua iloga le faaitiitia, po o le tuuitiitia o numera o sikolasipi, o lo o faatupeina mai e Malo o Ausetalia ma Niu Sila. E le gata i lea, ua le o toe atoatoa foi le faagasologa o nei polokalame, ona o faigata lava ia o femalagaiga i le tapunia o tatou alavaa.

O nisi o paaga ua faailoa mai ia lo latou manao e ofo mai ia avanoa faasikolasipi mo na o latou ua i ai faailoga muamua. Ma ua manaomia le siitia maualuga o nei faailoga, ina ia ogatasi ma agavaa moomia, mo le faatinoga o galuega i totolu o Samoa. O lona uiga, e agai tonu lava ia latou fesoasoani, i ituaiga tomai o lo o pito moomia mo le tatou atinae. Ua alagatatau ai, ona tatou vaavaai totoa i nei avanoa, e atiae ai ma siitia atili ai le tulaga o tatou aoaoga faale-Iunivesite i totolu o le tatou atunu, ia mafai ona tali atu i manaoga faatupulaia, faatupulaia pea o tupulaga o lo o televave foi le faatupulaia mo ni aoaoga talafeagai ma tulaga o le tatou lotofale ma le tamaoaiga o lo o mafai ona tatou maua. O le a mafai foi ona o tatou iloilo totoa, po o a tonu tomai ma agavaa, o lo o pito moomia mo lenei taimi, ia ma le lumanai lata mai.

E le gata i lea, ae e tatau ona toe iloilo atoa le tulaga o i ai faiaoga e latou te faatinoina nei galuega faapea foi faleaoga ma isi taulaga manaomia, ina ia mafai ona aoaoina ia o tatou tupulaga i totolu lava o Samoa, e le toe tau malaga ai i fafo. Nofonofo lava i autafa o le toeaina ma le loomatua ma mataitu lelei le amio, aua o le tasi lea faafitauli e faafeagai ma fanau e faatoa malaga atu i fafo. Ua saoloto, e na o le tatala atu lava i fafo, faatofa ma matua, alu atu loa i fafo saoloto, saolotoga faatoa maua e tafaovale ai. Galo uma ai lava loimata na maligi ma le ioega, o le a ou toaga e fai ia au meaaoga, ae maua uma lava i faamaumauga e lafo mai, faalapotopotoga i fafo e le tatou Komiti o Sikolasipi.

O lo o faagasolo faatalanoaga i le taimi nei, o le manulauti atoa lea, o fuafuaga mamao na faataoto mai e le matou Kabeneta, i lalo o le taitaiga a le Tootooalii. Tausaga 1983 i le 1984, ua 37 tausaga talu ai na faatu ai le Iunivesite i Vaivase, NUS ina ia maua ai avanoa maua gata o aoaoga maualuluga i Samoa nei, i taimi e tutupu mai ai faigata, i le ulufale atu o tatou fanau i Iunivesite i fafo. Pe a manatua i le taimi na ou faataatia ai le Tala o le Tupe i totolu o le Palemene lenei, ma faatu ai le fuafuaga mamao

a le Malo, o le a amata ia le Iunivesite i le \$5. O matafaioi lena faa-Matagaluega o Tupe, a manao e faaola se mataupu, mo faatalanoaga mulimuli ane ai, tuu i ai le \$5 aua a leai se mea e tuu i ai galo. Ia o metotia na sa faaaoga i na onapo.

Na matua ulagia le Malo, pei se mea ula le Iunivesite. O le a le Iunivesite i le lalolagi? O le a lea mea \$5? \$5 o le a faaaoga. Na faaulufale mai ai i inei ma se fuafuaga mo le uluai taimi, o le a to loa le matupalapala mo aoga i tua aoga a Eklesia. Amata mai i le \$50,000 le foai a le Malo i se taimi muamua lea, ua fai ai se mea faapea. I lou tutu atu i le nofoa lea e nofo ai le toeaina lea, o le Minisita o Tupe ma tolaukulau i totonusi o le Palemene lenei, sa matua talie ma ula le Itu Agai, ave le tou \$5 e fai ai se isi mea, se isi mea aoga. Tou te le faavaleaina le Malo ma le atunu. O lea ua tutulai mai nei nisi ua maua ai ni a latou galuega, nisi o faiaoga ai, e le toe manatua le Tala Faasolopito ma laulauvavale mai i le Malo na mafua ai ona maua le Iunivesite o lo o maua ai le pau falaoa. O le fautuaga faale-Tulafono, mo le faatinoga o le va fealoaloai faava-o-Malo, o matafaioi uma lava o le Matagaluega o le Va i Fafo, e ao ona faatino i le amanaia ai lea o pulega faatulafonoina o aiaiga uma o le Faavae o Samoa, faapea le maua gofie o avanoa o le Faamasinoga, o le amiontonu. E aofia ai le galulue felagolagomai i le faamalosia o Tulafono i le va ma isi Malo, e pei ona faatino ai le faafoi o se tagatanuu mai i atunu mamaao e tali i ona moliaga.

Lau Afioga i le Fofoga Fetalai ma le mamalu o le Maota, o lo o faasolosolo nei le faamaeaina o le faamaonia o tuaoi faa-gataifale o Samoa. O lo o fuatia e pei ona tuuina atu ai i le Ofisa o Mataupu tau Tulafono o Malo Aufaatasi i le 2017, faamaumauga o lo o atagia ai tatou Tulafono o ia tulaga. O nei faamaumauga o le a faavae ai le fuaina o tuaoi ma amata ai feutagaiga ma atunu tuaoi e i ai Amerika Samoa, Uea ma Futuna, Toga ma Toelau.

Ua i ai le faatuatuaga i le lelei o tatou talanoaga faava-o-Malo, ma nei atunu, ua mausali ai le faatulagaina o nei tuaoi i le faatausiusiuga ma o le a faigofie ai ona faamaonia aloaia i lalo o Tulafono faava-o-Malo. O le faamoemoe aua ne i toe suia nei tuaoi, e tusa lava pe aafia ai i ni suiga o le tau i le lumanai. E taua tele tuaoi nei, e iloa ai tatou ia, e iloa ai i fafo atu o tatou tuaoi, ia aua... ne i te i ane ua alu ane malosi uiga ese o se isi atunu e pei o Amerika loka se tatou vaafagota, ae o lea e taumate po o fea e tu ai le tuaoi. O lea ua oo i ai le faatofalaiga a lo tatou Malo e le tatau ona toe tuu loa nei mea ua tatau ona fai loa.

E tele feeseseseaiga na tutupu i aso ua tuanai i le va o tatou ma Tutuila. Na avea faamalosi ai e le Malo o Amerika nisi o tatou vaa. Sa ou fesoottai atu ina ua oo mai le talosaga, tali mai le Kovana i na ona tausaga ua mavae, o le a ou vaai i ai. Ou toe telefoni atu, ua a ? Faamalulu atu, o le mataupu a le Malo tele o Amerika. Ia pau lena o le mea na mafai ona tali mai ai Amerika Samoa, ona o le tulaga lenei, o la foi e i ai le Pulega Faa-Amerika i totonusi o

Tutuila. O le tau laa atu lava o Tutuila i lea mea tu ai ma le taofiga a le Malo tele o Amerika. O tulaga ia, e tatau ona faamaoti ai ia o tatou va tuaoi.

O le tatou feiloaiga muamua, na faafefe ai tatou e Amerika i le faapea mai, e tatau ona tuu i le va. Tatou finau e le afaina le va o tatou ma Amerika e i ai le motu la le e i luga, e mafuli mai le tele tatou e tusa ma le 6,000 ea maila faatafafafa, foi mai ia Samoa, ona taofi ai lea i ina ia talanoaga. Ua uma foi ona tatou faailoa ia Amerika i lena taimi e tatou te o lava e tau i le tumutumu, i le tumutumu o Faamasinoga faava-o-Malo ia aua ne i sao leaga o le eleele o le ogasami lena, i lalo o Tulafono faava-o-Malo, o le ogasami e pulea e Samoa. O lea e taoto ai i ina, o lea e faafogafoga mai, lea o le a toe amata si tatou mesi.

O Samoa, o se atunuu e mausali lona Pulega, has a very distinctive reputation in the Pacific for political stability. I le 25 tausaga talu ai, o lo o vaaia pea le tausia o pulega faatulafonoina, e mautu ma mauaa ana faiga faavae. Ae o lo o faia foi ni suiga talafeagai i faatinoga, o ia faiga faavae mo le taiala ma le atinae. O se tasi lea o mafuaaga o le faatu o Ofisa o le tatou Malo, Ofisa o Malo mai fafo i totonus o le tatou atunuu i le 5 tausaga talu ai, e pei ona i ai Ofisa o le OPEC Fund. O le faaputuga tupe lea a Malo Arapi o lo o auina ai i fafo latou suauu. Sa tele fesoasoani o latou foi na faatupeina tatou tane tetelie ia o lo o tu i Sogi, o lo o teumau ai suauu moomia. O le isi Faalapotopotoga, o le International Development Fund, o le Pacific Water and Waste Water Association, o le Asian Infrastructure Investment Bank, ma le PACER PLUS Implementation Unit.

Lau Afioga i le Fofoga Fetalai ma le mamalu o le Maota, e ono faatupulaia le avea o Samoa o se laumua po o se nofoaga tutotonu o le itulagi lenei ona o le iloga ona mausali o ana pulega, o ana taiala faale-Tulafono ma le malolosi o Faalapotopotoga, e faatinoina galuega a le tatou Malo. E faasino lea i le maualuga o lo o i ai le silafia o Ofisa Sili o Pulega o Matagaluega faapea foi le aufaigaluega a le Malo. O le toatele o latou ua foi mai i aoaoga ma faailoga. Ua maua le poto lautele, ua i ai foi ma le poto masani e faatino ai galuega a le Malo.

I le agai ai i le lumanai o le tuufaatasiga o faamaumauga, mo faamatalaga faava-o-Malo i maliega, ma feagaiga ua sainia e Samoa, o lo o i ai nei i le Matagaluega o le Va i Fafo. E fesoasoani tele i le maua o tagata uma o ia faamatalaga faale-tulafono.

Lau Afioga i le Fofoga Fetalai o le a mafai ai foi ona mataitu, pe o i ai ni vaega e tatau ai ona faaleleia atili, ina ia saga faamalosia ai, lo tatou auai pea i nei lio faava-o-Malo ma to ai manu aua le tapuaiga a Samoa i ona tupu ma ona ee, ae a le faanonogamanu a le aufaitatalo i fatafitaaulaga e fia. O nisi tulaga e ave i ai le faamuamua, o le saga faaleleia atili lea o agavaa ma tomai e faatino ai lo tatou va fealoaloai faava-o-Malo, faamautu faamatalaga ma faamaumauga moomia, ia lava tomai e iloilo ai ia tulaga uma. E moomia mo

ni faaiuga fai lelei saunia tapena, lava taoso ma faavae aua le tapenaina o ni faavaa faale-tulafono e taitaia ai le faatinoga o matafaioi esseese.

Lau Afioga i le Fofoga Fetalai, o Samoa o le atunu u e saili malo ona Taitai, saili malo ona tagata. Na muaimalae i le saofaiga a Malo o atumotu o le Pasefika. O le Malo foi o lo o leoleoina e lo tatou Matai Sili. O le Atua o Lona faavae papa. A lea e pese ai le fai Salamo, fai mai, "Pe a le leoleoina e le Atua le aai, e matamatafua i latou o e leoleoina." Pe a le leoleoina foi e le Atua le Malo o lo o faavae i Lona Suafa, e matamata fua foi i tatou uma o leoleoina.

Lau Afioga i le Fofoga Fetalai, o le a faagasolo tali a le Kabeneta i le uma ai o lau folasaga. E le i faia lau lauga, o le folasaga lea faatoa uma, ma o le a tuumatua le amataga o le tatou galuega, lea o le a sosoo atu ma lē o nofo i ou autafa, le Sui Palemia i le asō. O le a sosoo ma Ia, o le Toeaina matua o le Kabeneta ua leva ona tautua. O si ana toe ta lea, o si ana toe lauga lea a o faafogafoga mai lona itumalo. O lana toe sao lea i le tele o tausaga sa galue ai i le tatou Palemene nei. E tele lona sao, tele lona sao, ma o le a tuu atu ia te ia, o le a pasi atu le afi a le Kabeneta. O le afi e mumu saesae, se i o outou faafogafoga, o si ana toe tautua lea i lo tatou Malo, ona manumalo malolo ai lea. Fai mai le isi vaega e muamua le malolo ae mulimuli le manumalo, a o Ia, e amata i le manumalo, malolo ai. Ia, manuia alii le tou galuega o le a faasolo atu, ia ona toe foi mai loa lea ia te au, faatoa fai ai loa lau lauga moni. Ia soifua ma ia manuia.

Na faaalia le agaga fiafia o le Palemene i le patipati o latou aao i le maea ai o le Folasaga a le Afioga i le Palemia.

SUI FOFOGA FETALAI: Malo le saunoa i lau Afioga i le Palemia, po o le Taitai foi o le Malo. Ua ou manatu o lea ua tala tuāvalu lau o le fō, aua ua mānava le toaalii, ua motufau foi le lupe lele malie o le aso. E sao lelei lau saunoaga, o le matou faalogologo e na o le folasaga, ae e le i faia lau saunoaga autu, e tusa ma atinae o le tatou atunu. Malo le saunoa i lau Afioga, ua logo i tino ua logo i loto, lea ua faafogafoga Samoa, Samoa nei ma atunu i fafo. A o faafogafoga mai, a o e taumafai lava e tatala le faitotoa o le fale talatala o faiga faavae a le Malo Tutoatasi o Samoa i ona itu uma ma ona aulape.

O le upu moni ua leai lava se aulapa, e te le i tofuina i lenei aso. Samoa, o na ua outou faafogafoga, o le Taitai filifilia e le Atua. E faagaganaina e le Atua aua ua le gata lava ina faafogafoga aua atinae ma faiga paaga i le va i fafo o le Malo taumafai o Samoa, ma ana paaga e le gata i le Pasefika, a o le lalolagi atoa. A lea lava ua oooo i totonu o lona lotoifale le faamalamalamaina e le gata i ona atinae, ua maea ona faatino, ia a o fuafuaga alualu mamao foi mo le manuia o Samoa ma ona tagata. Faafetai tele, malo saunoa matou te le tau sulaina le toga memea ia. Faafetai tele, faamanuia le Atua.

Ma e, o se vaega laitiiti lava o le saunoaga e tatau ona oo i ai se upu le Nofoa leaga o lea e matau galu le atunuu, e faaopoopo i le saunoaga a le Afioga i le Fofoga Fetalai, ua uma ona faataoto lana tofa faatupu, i le tulaga lava o le tau faalumalumaina o le Palemene i upu lafo ma le va i fafo. E lelei la ona ou toe faaopoopo atu ma toe faamanatu atu i sui usufono mamalu o itumalo filifilia o le atunuu o lo o fai pea e latou le amio lea. O Tulafono Tumau a le Maota 62(7)(c), allow me to read it; “O lafoga tau faaleaga e faasino i le Fono Aoao po o so o se sui usufono po o so o se uiga le migao po o uiga e le tusa ai ma tulaga mamalu o le Palemene.” Ae faitau faatasi ma le Tulafono Tumau 14 o le Tautoga o le Loto Faamaoni. E faitau faatasi mea ia. O lona uiga, o le faifai agai i le Palemene ma le Fono Aoao ua e solia ai le Tulafono e 14 o le Tautoga o le Loto Faamaoni ou te faitauina; Ou te tauto i le Atua e Ona le Malosi uma lava, o le a Ou faamaoni ma tauaveina tonu le lotonuu faamaoni i le Malo Tutoatasi o Samoa, ma o le a Ou faataunuina ma le tatau ai ma le faamaoni ou tiute e avea ai o se Sui Usufono o le Palemene o Samoa. Ia fesoasoani mai le Atua ia te au.” Na ona ou toe faamanatu au, afai e le o Fono i le aso, faafogfa maia ou te folafola atu. O outou lava ua uma ona tauto, e te le faia ni uiga e ono faalumalumaina ai aemaise foi o saunoaga, le Fono Aoao a Samoa, o le Palemene lea.

O nai mea iti ia e taua ai le saunoaga a le Taitai o le Malo na taua i lana saunoaga i le taeao, e ao ona oo i ai se faamatalaga a le Nofoa i lenei taeao. E lelei ona utagia, ae le i oo ina oo i ona aulape. E le faatafa lava le Nofoa i lona tiute tauave pe a oo lava i ona ooooga. Ma o le talosaga lena, afai o faafogfa mai, ua uma ona tatou tautoto i luma o le Atua Soifua, tatou te faamaoni i lo tatou valaauna, tusa lava po o le a, e pule le Atua i lou soifua auauauna.

Ia, o si toe faaopoopo lea e uiga i le saunoaga, leaga o lea sa taea e le saunoaga a le Taitai o le Malo, e ao i le Nofoa ona oo i ai sana faamatalaga. Ia, malo saunoa i lau Afioga, o lea ua to lau pule, ia, o le a filimatua le faamoemoe o le Kapaneta. Ae ao foi ae le i tulai mai le Afioga i le Tama matua, le sui usufono mamalu mo Aana Alofi Nu.1 i Sasae, ou te fia faailoa atu, ua faailoa mai foi i le Nofoa, o lo o auai i le tatou Fonotaga lona faletua ma le nofo a alo e tapuaia le lauga a le Afioga i le Minisita. O le mea lea e momoli ai le faafetai i le afioga i le faletua, e le tuua ia tama le galuega, e tuu ia mau ma fusi ai le fau o Malo aua le tapuaiga o le saunoaga a le Afioga i le Minisita. Ou te valaaau ai ma le faaaloalo e tapa lau Afioga i le Minisita. Faafetai.

Talu ai o lea ua e faailoa mai, e ao foi ina ava le Nofoa. O lea ua toe 5 minute ona ta lava lea o le 1:00 e faamaea ai a tatou galuega. E le aoga foi ona sii lou vaa ae toe tutaia. E lelei ona tapena le faamoemoe ma sii i le Atua aua le aso a taeao pe afai e ave i ai le soifua ma le ola tatou te fesilafai i le Maota i Tiafau nei i Lona agalelei ma Lana faasoa.

Ou te manatu le paia o le Palemene i le pule tutoatasi a le Nofoa ua manatu ai ua maea galuega a le Palemene i lenei aso. Malo le faatoatoa, malo foi le onosai, faapea foi le tapuaiga a le atunu lautele. Malo saunoa i le Afioga i le Taitai o le Malo, ua logoitino mea uma i lenei aso.

Ae tatou te le i malolo i a tatou galuega o lenei aso, ou te valaau atu ma le faaaloalo i le sui usufono mamalu mo Faasaleleaga Nu.1 Sisifo e te faamaeaina le tatou galuega i lenei aso i se tatalo.

Na tolopo Taualumaga a le Fono Aoao Faitulafono i le itula e 12:59 i le aoauli seia aulia le Aso Faraile, 19 Fepuari 2021 i le itula e 9:00 i le taeao.